

Jangan benarkan kuasa2 besar guna PBB tambah pertikaian—PM

KUALA LUMPUR 24 Okt. — Amalan ugutan sama ada berbentuk kewangan atau politik, secara langsung atau tidak langsung oleh negara-negara besar ke atas negara-negara kecil adalah tidak sihat dan mesti disekat, kata Datuk Sri Dr. Mahathir Mohamad.

“Kita mesti jangan benarkan Bangsa-Bangsa Bersatu digunakan oleh kuasa-kuasa besar untuk menambahkan pertikaian di antara mereka.” tambah Perdana Menteri dalam perutusannya sempena

hari ulangtahun ke-40 Bangsa-Bangsa Bersatu yang dirayakan di ibu pejabatnya di New York dan di negara-negara anggota lainnya.

Perutusan itu dikeluarkan oleh Kementerian Luar semasa majlis perayaan hari ulangtahun tersebut di Wisma Putra di sini.

Katanya, sementara Bangsa-Bangsa Bersatu memperolehi publisiti sensasi mengenai isu-isu politik, sumbangannya yang sangat berharga dalam membela nasib golongan

tertindas, miskin dan terasingkir harus diberi pujian.

Bagaimanapun, katanya, tekanan politik dari negara-negara kaya dan kuat telah menyebabkan terhentinya usaha-usaha Bangsa-Bangsa Bersatu itu dan kebanyakan negara anggota tidak memperolehi apa yang sangat diperlukan mereka.

Sementara itu, Pemangku Ketua Setiausaha Kementerian Luar, Datuk Razali Ismail dalam ucapannya di majlis tersebut berkata, usaha Wisma Putra dalam soal itu adalah

untuk menghidupkan nilai-nilai baik dalam masyarakat dan negara yang boleh dihubungkan dengan prinsip dan nilai antara-bangsa.

Menurut beliau, penyelesaian masalah-masalah Dunia Ketiga akan menentukan arah dan kejayaan Bangsa-Bangsa Bersatu sementara masa depan badan dunia itu adalah berkait rapat dengan masa depan Dunia Ketiga.